

Cantidad di embarazo hubenil bahando pa aña

ORANJESTAD — Cantidad di embarasonan hubenil na Aruba a baha den aña 2014. Esaki Gino Goeloe, director di Wit Gele Kruis, a duna di conoce ayera durante un conferencia di prensa.

Rapport anual di Wit Gele Kruis ta mostra cu na 2014 a registra 126 caso di mama hoben. Na 2013 a registra 141 caso, 25 menos. Na 2012 tabatin 143 caso di mama hoben y na 2011 tabatin 153



caso. Segun Monique Giel di WGK, bario di Playa tabatin mayoria di e mamanan hoben cu a wordo registra. Tambe e diferencia di edad entre e mayornan ta un factor alarmante. A nota por ehempel caso di un mama di 15 aña y un tata di 38 aña. Na 2015 kier enfoca riba e edad hoben na cual mucha muhenan ta sali na estado. Ta nota casonan di muchanan cu ta sexualmente activo ya cu 10 aña di edad, mientras cu e

hombnernan cu ken nan ta sexualmente activo y te hasta ta sali na estado di dje ta den un averahe di 20 pa 40 aña di edad. Giel ta bisa cu e aña aki ademas kier enfoca riba problemanan social manera por ehempel uzo di droga. E ta nota cu tin hopi uzo di marihuana. Hopi biaha tambe ta lubida of no sa con pa haci uzo di anticonceptivo. Otro factornan ta financiero, na unda mamanan por ehempel no tin placa pa cumpra suficiente lechi of no por paga pa opvang pa nan yiu.

Curriculum

Sin embargo, cantidad di embarazo hubenil ta bahando pocopoco. Goeloe mes ta duna di conoce tambe cu a pesar di esaki, 'nos no ta na unda nos mester ta ainda, paso e ta keda halto'. P'esey WGK kier sigui cu e curriculum tocante e topico na scolnan. Pa dos aña caba ta trahando hunto cu Skoa riba e pakete di material escolar pa muchanan den 5e y 6e klas di scol basico y 1e y 2e klas di mavo y havo. Mate-

rial aki ta enfoca mas tanto riba norma y balor y e diferencia entre amistad y amor. E pakete aki lo mester cuminsa wordo ofreci na scolnan catolico, pero Goeloe ta haya cu e mester wordo ofreci na tur scol. Director di WGK ta haya tambe cu informacion riba droga y alcohol mester wordo inclui den e pakete cu ayudo di FADA, mirando cu esakinan tambe ta factornan cu ta contribui na embarazo hubenil. Goeloe di biaha a tuma oportunidad pa duna elogio na CEDEHM, Famia Planea, Voogdijraad, Imeldahof, Casa Cuna y Cede Aruba cu hunto cu WGK a traha pa conscientisa hobennan y purba reduci e cantidad di embarasonan hubenil. E director di WGK ta aña cu no solamente hobennan, pero tambe nan mayor mester wordo educa pa cu peligernan di embarazo hubenil. E kier mira cu e cantidad di embarazo hubenil pa aña baha bou 100, yega 50 y baha mas ainda na un cantidad di kisas 10 pa 14 caso pa aña. □

